

Datganiad o Bwerau Ymyrryd



Cynnwys

1. Cyflwyniad.....	3
Beth yw'r pwerau ymyrryd penodedig a pha rai sy'n berthnasol i mi?.....	3
Pam ydyn ni wedi paratoi'r ddogfen hon?.....	5
Pryd y bydd ein pwerau'n berthnasol?	5
2. Sut rydym yn defnyddio ein pwerau ymyrryd penodedig	7
3. Ymyriadau a nodir yn y Ddeddf.....	10
3.4. Monitro a Hyrwyddo Gwelliant o dan Adrannau 36 a 51 o'r Ddeddf.....	11
3.5. Cyngor a Chynhorthwy o dan Adrannau 37 a 52 o'r Ddeddf	14
3.6. Adolygiadau o dan Adrannau 38 a 53 o'r Ddeddf.....	16
3.7. Amodau Cofrestru Parhaus Penodol o dan Adran 29 o'r Ddeddf.....	17
3.8. Cyfarwyddydau ynghylch diffyg cydymffurfio ag amodau cofrestru parhaus (gan gynnwys yr Amod Terfyn Ffioedd) a gyhoeddwyd o dan Adran 39 o'r Ddeddf.....	21
3.9. Cyfarwyddyd mewn perthynas â methiant i gydweithredu a gyhoeddwyd o dan Adran 73(4) o'r Ddeddf.....	24
3.10. Dadgofrestru o dan Adran 41(3) o'r Ddeddf	27
3.11. Dadgofrestru Gorfodol o dan Adran 41(1) o'r Ddeddf	31

1. Cyflwyniad

1.1. Mae Medr yn monitro cydymffurfedd darparwyr cofrestredig a darparwyr a gyllidir â gofynion rheoleiddio ac, os bydd diffyg cydymffurfio, mae gennym bwerau statudol i ymyrryd i fynd i'r afael â'r materion hyn. Mae darparwyr cofrestredig (y darparwyr addysg uwch sydd yn cael eu derbyn ar y Gofrestr) yn cael eu rheoleiddio trwy ein hamodau cofrestru a darparwyr (y darparwyr addysg neu hyfforddiant trydyddol sydd yn derbyn cyllid gan Medr) a gyllidir yn cael eu rheoleiddio trwy ein hamodau cyllid. Mae rhai o'n pwerau hefyd yn berthnasol i ddarparwyr sy'n cyflwyno darpariaeth ar ran darparwyr cofrestredig, y cyfeirir atynt yn 'ddarparwyr allanol'. Mae gennym hefyd rai pwerau mewn perthynas â darpariaeth addysg drydyddol arall yng Nghymru nad yw'n cael ei chyflwyno gan ddarparwr cofrestredig na darparwr a gyllidir. Bydd Medr yn cyflawni ei swyddogaethau o ran pwysigrwydd amddiffyn rhyddid o fewn y gyfraith i ddarparwyr addysg yng Nghymru i gynnal eu rheolaeth ddyddiol mewn ffordd effeithiol a chymwys. Ni ddylid dehongli unrhyw beth yn y dogfennau rheoleiddio fel ei bod yn ofynnol i gorff llywodraethu darparwr addysg drydyddol wneud unrhyw beth sy'n anghydnaws ag unrhyw rwyngedigaeth gyfreithiol neu gyfyngiad cyfreithiol sy'n berthnasol i'r corff llywodraethu yn rhinwedd y ffaith bod y darparwr yn elusen, neu â dogfennau llywodraethu'r darparwr.

1.2. Yr ymyriadau canlynol yw'r rhai a bennir yn benodol yn **Neddf Addysg Drydyddol ac Ymchwil (Cymru) 2022** ('y Ddeddf') i'w defnyddio gan Medr i ddelio ag achosion o ddiffyg cydymffurfio, neu debygolrwydd o achosion o ddiffyg cydymffurfio, gan ddarparwr. Mae'r swyddogaethau ymyrryd hyn wedi'u nodi yn Adran 81 o'r Ddeddf fel y pwerau yn yr adrannau canlynol:

- (a) Adran 36 (dyletswydd i fonitro cydymffurfedd ag amodau cofrestru parhaus);
- (b) Adran 37 (cyngor a chynhorthwy mewn perthynas â chydymffurfedd ag amodau cofrestru parhaus);
- (c) Adran 38 (adolygiadau sy'n berthnasol i gydymffurfedd ag amodau);
- (d) Adran 39 (cyfarwyddyd mewn perthynas â Methiant i Gydymffurfio ag amodau cofrestru parhaus);
- (e) Adran 41 (dadgofrestru);
- (f) Adran 51 (dyletswydd i fonitro ansawdd addysg drydyddol reoleiddiedig a hybu gwelliant yn ansawdd yr addysg drydyddol honno);
- (g) Adran 52 (cyngor a chynhorthwy mewn perthynas ag ansawdd addysg drydyddol);
- (h) Adran 53 (adolygiadau sy'n berthnasol i ansawdd addysg drydyddol);
- (i) Adran 73(4) (cyfarwyddyd mewn perthynas â Methiant i Gydymffurfio â dyletswydd i gydweithredu).

Beth yw'r pwerau ymyrryd penodedig a pha rai sy'n berthnasol i mi?

1.3. Mae'r tabl isod yn crynhoi'r sail ar gyfer y pwerau ymyrryd sy'n berthnasol i wahanol fathau o ddarparwyr addysg drydyddol a hyfforddiant gan gynnwys darparwyr addysg uwch, addysg bellach a darparwyr addysg drydyddol a hyfforddiant eraill yng Nghymru sy'n cael cyllid gan Medr a darparwyr eraill sy'n cyflwyno darpariaeth yng Nghymru. Nid yw'r mathau o ddarparwyr a restrir isod bob amser yn annibynnol ar ei gilydd, gyda rhai darparwyr yn debygol o berthyn i fwy nag un 'math o ddarparwr'. Er enghraifft, gall darparwr addysg bellach hefyd gynnig addysg uwch o dan drefniadau is-gontractio neu freiniol fel "darparwr allanol" ac/neu o dan Ddynodiad Cwrs Penodol. Mae'r tabl hwn yn deillio o'r darpariaethau yn y Ddeddf,

gyda 'phwerau penodedig' yn golygu'r ymyriadau diffiniedig hynny a nodir yn benodol yn y Ddeddf, ac ymyriadau 'amhenodedig' eraill yn golygu'r ymyriadau posibl hynny nad ydynt wedi'u diffinio'n benodol ond sy'n cael eu hategu'n gyffredinol gan y ddeddfwriaeth. Nid yw'r Datganiad o Bwerau Ymyrryd hwn yn cynnig gwybodaeth am yr ymyriadau hynny nad ydynt yn rhai penodedig. Mae'r wybodaeth amdanynt gyda'n dull rheoleiddio yn ein Fframwaith Rheoleiddio.

Tabl 1: Ymyriadau posib yn ôl math o ddarparwr

Math o ddarparwr	Sail ar gyfer ymyrryd
Darparwyr addysg uwch cofrestredig	- yr holl bwerau ymyrryd penodedig yn y Ddeddf sy'n gysylltiedig ag amodau cofrestru parhaus perthnasol - ymyriadau amhenodedig eraill sy'n gysylltiedig ag amodau cofrestru
Darparwyr addysg uwch heb gofrestru o dan drefniadau breiniol/dilysu ('darparwyr allanol')	- pwerau ymyrryd penodedig yn y Ddeddf ynghylch monitro a hybu gwelliant, cyngor a chynhorthwy ac adolygiadau sy'n gysylltiedig â'r Amod Cofrestru mewn perthynas ag Ansawdd - pwerau ymyrryd a nodir yn y Ddeddf ynglŷn â Chyfarwyddyd mewn Cysylltiad â Methiant i Gydweithredu
Sefydliadau addysg bellach nad ydynt wedi'u cofrestru	- pwerau ymyrryd penodedig y Ddeddf ynghylch monitro a hybu gwelliant, cyngor a chynhorthwy ac adolygiadau sy'n gysylltiedig â'r Amod Cyllid mewn perthynas ag Ansawdd - pwerau ymyrryd a nodir yn y Ddeddf ynglŷn â Chyfarwyddyd mewn Cysylltiad â Methiant i Gydweithredu - ymyriadau amhenodedig eraill sy'n gysylltiedig â'r amodau cyllido - pwerau ymyrryd Gweinidogion Cymru a bennir gan y Ddeddf
Darparwyr addysg drydyddol a hyfforddiant eraill a gyllidir nad ydynt wedi'u cofrestru (darparwyr prentisiaethau a dysgu oedolion a'r gymuned)	- pwerau ymyrryd penodedig y Ddeddf ynghylch monitro a hybu gwelliant, cyngor a chynhorthwy ac adolygiadau sy'n gysylltiedig â'r Amod Cyllido mewn perthynas ag Ansawdd - pwerau ymyrryd a nodir yn y Ddeddf ynglŷn â Chyfarwyddyd mewn Perthynas â Methiant i Gydweithredu - ymyriadau amhenodedig eraill sy'n gysylltiedig ag amodau cyllido
Chweched dosbarth mewn ysgolion a gyllidir trwy eu hawdurdod lleol	- pwerau ymyrryd penodedig y Ddeddf ynghylch monitro a hybu gwelliant, cyngor a chynhorthwy ac adolygiadau mewn perthynas ag Ansawdd - ymyriadau amhenodedig eraill sy'n gysylltiedig ag Ansawdd a Chod Ymgysylltu â Dysgwyr.

Math o ddarparwr	Sail ar gyfer ymyrryd
Darpariaeth addysg drydyddol a hyfforddiant arall yng Nghymru nad yw'n cael ei chyflwyno gan ddarparwr cofrestredig na ddarparwr a gyllidir	pwerau'r Ddeddf ynghylch asesu Ansawdd a phwerau ymyrryd penodedig cysylltiedig ynghylch cyngor a chynhorthwy ac adolygiadau mewn perthynas ag Ansawdd

- 1.4. Mae **chweched dosbarth** mewn ysgolion yn ddarostyngedig i amod cyllido Medr mewn perthynas ag Ansawdd. Os bydd angen ymyrryd mewn perthynas â darpariaeth chweched dosbarth ysgolion, fel arfer bydd ymgysylltiad â'r awdurdod lleol perthnasol, sef yr awdurdod cynnal a chadw ar gyfer y ddarpariaeth o'r fath. Felly, dylid darllen cyfeiriadau yn y ddogfen hon at "gorff llywodraethu" fel cyfeiriadau at yr awdurdod lleol yn gweithredu drwy ei gyrff llywodraethu a sicrwydd sefydledig sy'n gyfrifol am addysg ôl-16. Yn yr un modd, mae addysg oedolion a'r gymuned wedi'i chynnwys yn amodau cyllido Medr, ac yn y rhan fwyaf o achosion, os bydd angen ymyrraeth, byddwn yn cysylltu â'r awdurdod lleol neu'r coleg addysg bellach fel y bo'n berthnasol. Byddwn yn gweithio gydag awdurdodau lleol a cholegau i ddatblygu ein trefniadau.
- 1.5. Y bwriad yw bod y pwerau hyn yn galluogi rhywfaint o gydlynid yn y dull ymyrryd rheoleiddiol ar draws y sector addysg drydyddol. Mae hyn yn arbennig o wir mewn perthynas â'n dull o reoleiddio ansawdd, gyda rhai o'n pwerau ymyrryd penodedig yn berthnasol i'r rhan fwyaf o ddarparwyr trydyddol. Mewn rhai meysydd rheoleiddio eraill, mae ymyriadau penodedig ar gyfer darparwyr cofrestredig, sy'n gysylltiedig ag amodau cofrestru, yn cael eu hailadrodd ar gyfer darparwyr addysg drydyddol nad ydynt wedi'u cofrestru fel ymyriadau amhenodedig sy'n gysylltiedig ag amodau cyllido. Yn achos sefydliadau addysg bellach, mae gallu Medr i gyflawni ymyriadau penodedig ac amhenodedig yn cael ei ategu gan bwerau ymyrryd penodedig Gweinidogion Cymru eu hunain ar gyfer y darparwyr hyn.

Pam ydyn ni wedi paratoi'r ddogfen hon?

- 1.6. Mae ein dull o reoleiddio, gan gynnwys yr hyn mae'n ei olygu ar gyfer monitro ac ymyrryd, wedi'i nodi yn ein Fframwaith Rheoleiddio. Mae Adran 81 o'r Ddeddf yn ei gwneud yn ofynnol i ni gyhoeddi Datganiad sy'n nodi sut rydym yn bwriadu arfer ein pwerau ymyrryd ac adolygu'r Datganiad hwnnw'n gyson. Mae'r ddogfen hon yn bodloni'r gofyniad hwnnw, gan ddarparu canllaw i'n pwerau ymyrryd penodedig ar gyfer y Ddeddf a sut y bydd y rhain yn cael eu defnyddio. Mae ein defnydd o bwerau ymyrryd yn cael ei oleuo gan ein hathroniaeth reoleiddio, a amlinellir yn y Fframwaith Rheoleiddio.

Pryd y bydd ein pwerau'n berthnasol?

- 1.7. Mae llawer o'n pwerau ymyrryd ar gyfer darparwyr addysg uwch yn gysylltiedig ag amodau cofrestru o dan y Ddeddf. Bydd yr amodau'n cael eu cyflwyno mewn dwy gyfres, gyda'r amodau cyntaf ar waith o 1 Awst 2026 a'r ail gyfres ar waith o 1 Awst 2027. Mae hyn yn golygu, er y bydd ein pwerau ymyrryd o dan y Ddeddf yn berthnasol yn y rhan fwyaf o feysydd o 1 Awst 2026 ymlaen, na fydd y pwerau'n

berthnasol mewn rhai meysydd tan 1 Awst 2027. Amlygir y meysydd hynny yn y ddogfen hon lle bo'n briodol.

- 1.8. Bydd yr amodau cyllido newydd ar gyfer rhan fwyaf o ddarparwr addysg drydyddol eraill yn dod i rym o 1 Awst 2026. Bydd y rhain yn disodli unrhyw amodau cyllido blaenorol o'r adeg honno. Bwriad y ddogfen hon felly yw bodloni'r ddyletswydd yn Adran 66 o **Ddeddf Addysg Bellach ac Uwch 1992**.
- 1.9. I ddarparwyr addysg uwch sy'n cofrestru gyda Medr, mae rhan fwyaf o'r anghenion rheoleiddio o dan **Ddeddf Addysg Uwch (Cymru) 2015** (Deddf 2015) yn dod i ben ar 31 Gorffennaf 2026, ac yn cael eu disodli gan y gyfres gyntaf o bwerau newydd sy'n gysylltiedig â'r gofrestr. Fodd bynnag, am na fydd pob un o'r pwerau newydd yn cael eu cyflwyno ar yr un pryd, bydd blwyddyn academiaidd 2026/27 yn flwyddyn drosiannol lle bydd amodau cofrestru ar waith ochr yn ochr â rhai o ofynion rheoleiddio y Cynllun Ffioedd a Mynediad sy'n weddill o dan Ddeddf 2015. Mae pwerau Deddf 2015, a fydd yn parhau ar waith ar gyfer 2026/27, mewn perthynas ag ymyriadau ar ffioedd myfyrwyr a gofynion cyffredinol y Cynlluniau Ffioedd a Mynediad cymeradwy wedi'u nodi yn [Natganiad Ymyrryd](#) Deddf 2015.
- 1.10. Bydd yr ystod lawn o amodau cofrestru ar gyfer darparwyr cofrestredig addysg uwch o dan y Ddeddf yn dod i rym o 1 Awst 2027. Ar y pwynt hwnnw, bydd yr holl bwerau ymyrryd penodedig sy'n gysylltiedig â'r Cynllun Ffioedd a Mynediad sy'n weddill o dan Ddeddf 2015 yn dod i ben ar gyfer y darparwyr hynny.

NODYN: Ar gyfer Blwyddyn Academiaidd 2026/27 (1 Awst 2026 – 31 Gorffennaf 2027), cwmpesir y pwerau ymyrryd mewn perthynas â Therfynau Ffioedd a Chyfle Cyfartal ar gyfer Darparwyr Cofrestredig gan bwerau Deddf 2015 yn [Natganiad Ymyrryd](#) Deddf 2015.

2. Sut rydym yn defnyddio ein pwerau ymyrryd penodedig


Mae'r adran hon yn berthnasol i'r canlynol: Darparwyr cofrestredig yn y ddau gategori yn ôl yr angen (pob amod cofrestru), darparwyr allanol (Ansawdd), darparwyr addysg bellach a hyfforddiant eraill a gyllidir (Ansawdd) a darpariaeth drydyddol arall yng Nghymru nad yw'n cael ei darparu gan ddarparwr cofrestredig na darparwr a gyllidir (Ansawdd).

- 2.1. Ar gyfer yr holl ddarparwyr addysg drydyddol a hyfforddiant yng Nghymru, lle mae monitro wedi darparu tystiolaeth o beidio â chydymffurfio â'r amodau cymwys, mae hyn yn goleuo ystyriaeth Medr i ymyriadau posibl a grynhoir yn [Ffigur 1](#) isod. Efallai y penderfynwn, ar ôl i ni ystyried mater o ddiffyg cydymffurfio, i beidio â chymryd unrhyw ymyrraeth. Er enghraifft, lle rydym yn credu bod y darparwr yn cymryd camau digonol i ddatrys y broblem neu lle rydym yn cymryd camau i helpu'r sector i na fydd y mater yn cael ei ailadrodd. Fodd bynnag, mae'n bosib byddwn yn cymryd camau ymyrryd ar unrhyw adeg pan rydym o'r farn bod unrhyw amod cofrestru parhaus wedi cael ei dorri, neu'n debygol o gael ei dorri, gan ddarparwr cofrestredig neu fod unrhyw amod cyllido wedi cael ei dorri, neu'n debygol o gael ei dorri, gan ddarparwyr addysg drydyddol a hyfforddiant eraill. **Lle bynnag y bo'n briodol, ym marn Medr, byddwn yn ymgysylltu â darparwyr i geisio datrys materion cyn cychwyn ymyrraeth. Er bod Medr yn cadw'r hawl i ddefnyddio ei bwerau ymyrryd yn ôl yr angen, ni fyddem fel arfer yn disgwyl defnyddio ein pwerau i fynd i'r afael â mân achosion o ddiffyg cydymffurfio, yn enwedig lle mae gan ddarparwr brosesau cadarn ar waith a bod ei benderfyniadau wedi bod yn rhesymol, neu ei fod wrthi'n cymryd pob cam rhesymol i ddatrys problemau.**
- 2.2. Lle mae angen i ni ymyrryd, bydd y math o ymyrraeth yn dibynnu ar amrywiaeth o ffactorau, gan gynnwys:
- **difrifoldeb** – pwy sy'n cael ei effeithio gan y mater a graddfa a difrifoldeb yr effaith honno. Gellir ystyried yr effaith yn nhermau cwmipas a lefel unrhyw ddrwg a wneir i ddysgwyr, staff, arian cyhoeddus, enw da
 - **parhad** – am faint o amser y mae'r mater wedi bod yn mynd rhagddo ac a yw'r mater yn un sy'n ailadrodd
 - **camau gweithredu'r darparwr** – camau gweithredu y mae'r darparwr wedi'u cymryd i fynd i'r afael â'r mater
 - **cyd-destun** – yr hyn y mae ein gwybodaeth reoleiddiol ehangach yn ei ddweud wrthym
 - **risg** – y risg a achosir gan y darparwr a'n parodrwydd ni i dderbyn risg mewn perthynas â'r mater
 - **dyletswyddau statudol** – y goblygiadau ar gyfer dyletswyddau statudol Medr

Bydd Medr yn ystyried y ffactorau uchod mewn modd hyblyg, ynghyd ag unrhyw ffactorau perthnasol eraill, a gall y pwysau a roddir i bob un o'r ffactorau amrywio yn ôl ffeithiau'r achos. Bydd Medr yn ymateb i faterion fesul achos unigol, a byddwn yn ymdrechu i sicrhau bod unrhyw ymyriadau yn gymesur ac yn rhesymol. Mewn rhai achosion, efallai y byddwn yn ystyried defnyddio ymyriadau eraill heb eu nodi i ddatrys problemau, fel mwy o ymgysylltu â darparwr, yn hytrach na'r ymyriadau penodol a nodir yn y ddogfen hon. Mae hyn yn arbennig o

debygol o fod yn wir lle nad yw unrhyw ddiffyg cydymffurfio yn ddifrifol nac yn barhaus.

Ffigur 1. Ystyried Ymyriadau Posibl



- 2.3. Yn achos darparwyr allanol (darparwyr sy'n cyflwyno darpariaeth ar ran darparwyr cofrestredig) a darparwyr eraill a gyllidir, byddwn yn cymryd camau gweithredu fel a ganiateir gan ein pwerau ymyrryd. Gallwn ymyrryd trwy Ddarparwr Cofrestredig lle mae darparwr allanol, sy'n cyflwyno darpariaeth ar ei ran, wedi torri gofynion ansawdd. Byddwn yn gwneud hyn ni waeth beth fo lleoliad y ddarpariaeth honno, gan olygu bod darparwyr allanol yng Nghymru, mewn mannau eraill yn y DU a thramor yn cael eu cwmpasu gan agweddau ar ein pwerau monitro ac ymyrryd.

NODYN: Ar gyfer darparwyr cofrestredig, ar gyfer blwyddyn drosiannol 2026/27 yn unig (1 Awst 2026 tan 31 Gorffennaf 2027), byddwn hefyd yn cymryd camau ymyrryd ar unrhyw adeg pan fyddwn yn ystyried bod ein gofynion rheoleiddio sy'n weddill o dan Ddeddf 2015 (Terfynau Ffioedd a Gofynion Cyffredinol Cynlluniau Ffioedd a Mynediad Cymeradwy) wedi cael eu torri, neu'n debygol o gael eu torri. Mae hyn yn berthnasol i ddarparwyr cofrestredig sydd â Chynllun Ffioedd a Mynediad cymeradwy yn unig. Caiff y pwerau ymyrryd statudol hynny sy'n weddill o dan Ddeddf 2015 eu nodi yn [Natganiad Ymyrryd](#) Deddf 2015.

- 2.4. Gall ymyriad fod ar ffurf ystod o gamau gweithredu, gan gynnwys camau gweithredu o dan bwerau'r Ddeddf. Mae Adran 81 o'r Ddeddf yn ei gwneud yn ofynnol i Medr gyhoeddi Datganiad sy'n nodi sut mae'n bwriadu arfer ei swyddogaethau ymyrryd ac adolygu'r Datganiad hwnnw'n gyson. Mae'r ddogfen hon yn bodloni'r gofyniad hwnnw. Mae ymyriadau amhenodedig eraill y gellid eu defnyddio gan Medr hefyd wedi'u cynnwys, gan gynnwys y defnydd posibl o gyllid fel lifer i ysgogi cydymffurfedd, wedi'u cynnwys yn Fframwaith Rheoleiddio Medr.

3. Ymyriadau a nodir yn y Ddeddf

3.1. Mae ystod o ymyriadau wedi'u nodi'n benodol yn y Ddeddf y gall Medr eu defnyddio i ymdrin â diffyg cydymffurfio, neu debygolrwydd o ddiffyg cydymffurfio, gan ddarparwr.

- (a) Adran 36 (dyletswydd i fonitro cydymffurfedd ag amodau cofrestru parhaus);
- (b) Adran 37 (cyngor a chynhorthwy mewn cysylltiad â chydymffurfedd ag amodau cofrestru parhaus);
- (c) Adran 38 (adolygiadau sy'n berthnasol i gydymffurfedd ag amodau);
- (d) Adran 39 (cyfarwyddyd mewn cysylltiad â Methiant i Gydymffurfio ag amodau cofrestru parhaus);
- (e) Adran 41 (dadgofrestru);
- (f) Adran 51 (dyletswydd i fonitro ansawdd addysg drydyddol reoleiddiedig ac i hybu gwelliant yn ansawdd yr addysg honno);
- (g) Adran 52 (cyngor a chynhorthwy mewn cysylltiad ag ansawdd addysg drydyddol);
- (h) Adran 53 (adolygiadau sy'n berthnasol i ansawdd addysg drydyddol);
- (i) Adran 73(4) (cyfarwyddyd mewn cysylltiad â Methiant i Gydymffurfio â dyletswydd i gydweithredu).

Yn ogystal â'r ymyriadau uchod, Mae Adran 29 o'r Ddeddf yn galluogi Medr i osod amodau cofrestru parhaus penodol, naill ai ar adeg cofrestru neu unwaith y byddant eisoes ar y Gofrestr.

3.2. Er bod yr ymyriadau uchod i gyd yn ymwneud â darparwyr cofrestredig, mae cyngor a chynhorthwy mewn perthynas ag ansawdd ac adolygiadau mewn perthynas ag ansawdd hefyd yn berthnasol i:

- Ddarparwyr allanol (darparwyr sy'n cyflwyno darpariaeth ar ran darparwyr cofrestredig)
- Darparwyr addysg bellach a hyfforddiant a gyllidir ond nad ydynt ar y gofrestr (darparwyr a gwmpesir gan amodau cyllido)
- Darpariaeth drydyddol arall yng Nghymru nad yw'n cael ei chyflwyno gan ddarparwyr cofrestredig neu ddarparwyr a gyllidir.

Gall cyfarwyddyd mewn perthynas â Methiant i Gydymffurfio â dyletswydd i gydweithredu gael eu defnyddio ar unrhyw adeg lle mae darparwr allanol neu ddarparwr addysg bellach a hyfforddiant a gyllidir (heb gynnwys darparwyr cofrestredig) wedi methu darparu gwybodaeth, cynhorthwy a mynediad at ei gyfleusterau, systemau ac offer yr ydym ni, neu ein hasiantau, yn rhesymol yn ei gwneud yn ofynnol iddo eu darparu at ddibenion arfer ein swyddogaethau. **Ym mhob adran isod rydym wedi cyfeirio at y mathau o ddarparwyr y mae'r pwerau ymyrryd yn berthnasol iddynt.**

3.3. Pan fyddwn yn bwriadu defnyddio ein pwerau ymyrryd penodedig, bydd hyn yn cael ei gyfleu'n glir ac yn dryloyw i'r darparwr. Mae'r Ddeddf yn ei gwneud yn ofynnol i Medr gyhoeddi hysbysiad ynghylch rhai ymyriadau penodol, ond gall Medr hefyd benderfynu cyhoeddi gwybodaeth am ymyriadau eraill, a'r materion cydymffurfio cysylltiedig, lle mae o'r farn bod hynny'n briodol ac yn rhesymol. Gall gwybodaeth gael ei chyhoeddi hefyd gan gyrff eraill sy'n gweithredu ar ran Medr. Er y bydd Medr yn ystyried y risgiau posibl i ddarparwr sy'n gysylltiedig â chyhoeddi gwybodaeth am

unrhyw ymyriad, rhaid taro cydbwysedd rhwng hyn ac ystyriaethau ehangach sy'n cynnwys, er enghraifft, yr angen i hybu cydymffurfedd ac ysgogi gwelliant parhaus.

3.4. **Monitro a Hyrwyddo Gwelliant o dan Adrannau 36 a 51 o'r Ddeddf**

Mae'r adran hon yn berthnasol i: Ddarparwyr cofrestredig (pob amod cofrestru parhaus), darparwyr allanol (Ansawdd yn unig) a darparwyr eraill a gyllidir – gan gynnwys darparwyr addysg bellach a hyfforddiant a gyllidir a chweched dosbarth a gyllidir mewn ysgolion drwy eu hawdurdodau lleol perthnasol (Ansawdd yn unig).

3.4.1. Rydym yn cyflawni ystod o weithgareddau monitro, sy'n hanfodol i ni allu cyflawni ein swyddogaethau rheoleiddio, gyda gwybodaeth o brosesau monitro'n tanategu'r potensial i ymyrryd mewn achosion o ddiffyg cydymffurfio.

3.4.2. **Amodau cofrestru parhaus** - Mae Adran 36 o'r Ddeddf yn gosod dyletswydd gyfreithiol ar Medr i fonitro cydymffurfedd ag amodau cofrestru parhaus gan ddarparwyr cofrestredig. Mae hyn yn golygu y bydd darparwyr yn cael eu monitro yn erbyn gofynion eu categori cofrestru penodol. Fel y nodir isod, bydd llawer o weithgarwch monitro Medr mewn perthynas â chydymffurfio ag amodau cofrestru parhaus yn gylchol ac yn rheolaidd ei natur, er y gellir gwneud gwaith monitro manylach lle y nodir pryderon. Gall y gwaith monitro manylach hwn danategu camau ymyrryd pellach. Lle mae monitro'n adnabod meysydd ar gyfer gwella, neu enghreifftiau o arferion da, gall Medr hefyd ddarparu cyngor neu ganllawiau i helpu ysgogi cydymffurfedd.

3.4.3. **Ansawdd** - Mae Adran 51¹ o'r Ddeddf yn gosod dyletswydd gyfreithiol ar Medr i fonitro ansawdd addysg drydyddol reoleiddiedig a hybu gwelliant yn ansawdd yr addysg honno. Mae hyn yn cynnwys addysg drydyddol:

- (a) a ddarperir gan, neu ar ran, darparwyr cofrestredig (i'r graddau y mae'r addysg drydyddol yn ymwneud â chategoriâu cofrestru'r darparwyr); neu
- (b) a gyllidir gan Medr neu a sicrhair fel arall ganddo

O ganlyniad, mae'r ddyletswydd hon i fonitro a hybu gwelliant mewn perthynas ag ansawdd yn berthnasol i'r holl ddarparwyr addysg drydyddol yng Nghymru sydd wedi'u cofrestru neu sy'n ddarostyngedig i amodau cyllid Medr. Mae rhagor o fanylion am drefniadau Medr i fonitro ansawdd addysg drydyddol a hybu gwelliant yn ansawdd yr addysg honno wedi'u nodi yn Fframwaith Ansawdd Medr.

3.4.4. Bydd monitro cydymffurfedd ag amodau cofrestru parhaus, a monitro ansawdd addysg drydyddol, yn cael ei wneud trwy nifer o ddulliau, ond bydd yn cynnwys, er enghraifft: ystyried ffurflenni monitro a sicrwydd blynyddol a gyflwynir gan y darparwr; adolygu datganiadau ariannol blynyddol, rhagolygon a gwybodaeth ariannol arall; adolygu gwybodaeth am ansawdd, gan gynnwys unrhyw adroddiadau asesu neu arolygu; dadansoddi amrywiaeth o ddata a gyhoeddwyd ar berfformiad; ystyried pryderon rheoliadol a gafwyd ynglŷn â'r darparwr; ac unrhyw adroddiadau am ddigwyddiadau difrifol a gyflwynwyd. Er y gellir cael llawer

¹ Nid yw Adran 51 o'r Ddeddf yn ymestyn i ddarparwyr a ariennir o dan Adran 65 o Ddeddf 1992 – er nad yw'r ddyletswydd yn ymestyn i ddarparwyr a ariennir o dan Adran 65, gall Medr arfer Adran 53 o'r Ddeddf mewn perthynas â'r darparwyr hynny.

o'r wybodaeth fonitro hon ar sail gylchol, gellir cael rhywfaint o wybodaeth fonitro, fel pryderon rheoliadol am ddarparwyr ac adroddiadau a gyflwynir am ddiwyddiadau difrifol, unrhyw bryd. Darperir rhagor o wybodaeth am yr hyn rydym yn ei fonitro ar gyfer gwahanol fathau o ddarparwyr isod.

Darparwyr addysg uwch cofrestredig

3.4.5. Rydym yn monitro cymhwysra darparwr ar gyfer cofrestru a'i gydymffurfedd â'r amodau cofrestru cychwynnol fel rhan o'r broses a ddefnyddir gan ddarparwyr i wneud cais i ddod yn gofrestredig. Mae'r amodau cychwynnol hyn, a fydd ar waith o 1 Awst 2026, yn cwmpasu'r meysydd canlynol:

- Cynaliadwyedd Ariannol
- Llywodraethu a Rheoli
- Ansawdd a Gwelliant Parhaus
- Lles² Staff a Dysgwyr
- Trefniadau Dilysu
- Statws Elusennol (categori craidd yn unig)
- Gwybodaeth a Ddarperir i Ddarpar Fyfyrrwyr

Mae'r amodau cofrestru cychwynnol, gan gynnwys gofynion yr amodau a'r canllawiau cysylltiedig ar gyfer darparwyr yn cael eu cyhoeddi ar wahân gan Medr.

3.4.6. Bydd y broses ymgeisio ar gyfer cofrestru'n cynnwys craffu ar amrywiaeth o wybodaeth a ddefnyddir i wneud dyfarniad ynglŷn â chydymffurfedd. Mae hyn yn cynnwys, er enghraifft, gwybodaeth i ddangos tystiolaeth o gynaliadwyedd ariannol darparwr, digonolrwydd ei drefniadau llywodraethu a rheoli ac ansawdd ei ddarpariaeth. Lle y bo angen, bydd Medr yn ceisio gwybodaeth ychwanegol gan ddarparwr ar ôl cyflwyno ei gais wrth benderfynu ar gydymffurfedd. Mae rhagor o wybodaeth am y broses i ymgeisio ar gyfer cofrestru'n cael ei chyhoeddi ar wahân.

3.4.7. Ar ôl cofrestru, rhaid i ddarparwyr gydymffurfio ag amodau cofrestru parhaus. Mae'r amodau parhaus hyn yn cwmpasu'r meysydd canlynol. Oni nodir yn wahanol, bydd yr amodau parhaus hyn yn dod i rym o 1 Awst 2026:

- Cynaliadwyedd Ariannol
- Llywodraethu a Rheoli
- Ansawdd
- Lles Staff a Dysgwr
- Y Gymraeg
- Cynllun Diogelu Dysgwyr
- Cod Ymgysylltu â Dysgwyr
- Cyfle Cyfartal (Categori Craidd AU yn Unig) (Ar waith o 1 Awst 2027). Ar gyfer 2026/27 mae'r maes hwn yn cael ei gwmpasu gan bwerau Deddf 2015 - gweler Datganiad o Ymyrryd Deddf 2015 am y pwerau hyn
- Gweithdrefnau Cwynion
- Sylw i Gyngor ac Arweiniad
- Gwybodaeth, Cymorth a Mynediad
- Trefniadau Dilysu

² Mae Medr yn dehongli 'lles' yn unol â'r memorandwm esboniadol ar gyfer y Ddeddf. Eglurir hyn yn Fframwaith Rheoleiddio Medr.

- Statws Elusennol (Categori Craidd AU yn Unig)
- Gwybodaeth a Ddarperir i Ddarpar Fyfyrrwyr
- Terfynau Ffioedd (Categori Craidd AU yn Unig) (Ar waith o 1 Awst 2027). Ar gyfer 2026/27 mae'r maes hwn yn cael ei gwmpasu gan bwerau Deddf 2015 - gweler Datganiad o Ymyrryd Deddf 2015 am y pwerau hyn
- Hysbysu am Newidiadau sy'n effeithio ar Gywirdeb Gwybodaeth
- Statws fel Darparwr Addysg Drydyddol yng Nghymru

Mae'r amodau cofrestru parhaus, gan gynnwys gofynion yr amodau a'r canllawiau cysylltiedig ar gyfer darparwyr yn cael eu cyhoeddi ar wahân. Mae'n bosibl y bydd darparwyr cofrestredig hefyd yn destun amodau cyllido ychwanegol hefyd, gan gynnwys mewn perthynas â chyllid ymchwil ac arloesi Medr. Mae rhagor o wybodaeth am ein hamodau cyllido yn cael ei chyhoeddi ar wahân.

Darparwyr addysg uwch nad ydynt wedi'u cofrestru o dan drefniadau breiniol/is-gontractio (darparwyr allanol)

3.4.8. Byddwn yn monitro cydymffurfedd darparwyr allanol (darparwyr sy'n cyflwyno darpariaeth ar ran darparwyr rheoleiddiedig h.y. darpariaeth 'freiniol/is-gontractio' – nid darpariaeth wedi'i dilysu) â gofynion amodau cofrestru sy'n ymwneud ag ansawdd. Gwneir hyn ni waeth lle mae'r darparwr allanol wedi'i leoli. Bydd monitro'n digwydd trwy'r prosesau a gymhwysir i ddarparwyr cofrestredig.

Darparwyr addysg bellach a hyfforddiant a gyllidir (gan gynnwys prentisiaethau a darparwyr dysgu oedolion a'r gymuned)

3.4.9. Er ei bod yn debygol y bydd llawer o golegau addysg bellach yn cael eu cofrestru ar gyfer eu darpariaeth addysg uwch, ar gyfer y darparwyr addysg bellach a hyfforddiant (gan gynnwys prentisiaethau a dysgu oedolion a'r gymuned) hynny a gyllidir nad ydynt wedi'u cofrestru, mae dyletswydd arnom i fonitro a hyrwyddo ansawdd. Mae rhagor o wybodaeth am ein hamodau cyllid yn cael ei chyhoeddi ar wahân.

Chweched dosbarth mewn ysgolion a gyllidir

3.4.10. Ar gyfer chweched dosbarth mewn ysgolion a gynhelir yng Nghymru, mae dyletswydd arnom i fonitro a hybu ansawdd.

Darpariaeth drydyddol arall yng Nghymru

3.4.11. Ar gyfer darpariaeth drydyddol arall yng Nghymru, nad yw'n cael ei chyflwyno gan ddarparwyr cofrestredig na darparwyr a gyllidir, gallwn gael ein rhybuddio am faterion ansawdd.

3.5. Cyngor a Chynhorthwy o dan Adrannau 37 a 52 o'r Ddeddf

Mae'r adran hon yn berthnasol i: Ddarparwyr cofrestredig (pob amod cofrestru parhaus), darparwyr allanol (Ansawdd yn unig) darparwyr eraill a gyllidir – gan gynnwys darparwyr addysg bellach a hyfforddiant a gyllidir a chweched dosbarth a drwy eu hawdurdodau lleol perthnasol (Ansawdd yn unig) a darpariaeth drydyddol arall yng Nghymru nad yw'n cael ei chyflwyno gan ddarparwr cofrestredig na darparwr a gyllidir (Ansawdd yn unig).

- 3.5.1. Un o'r pwerau ymyrryd lefel-is allweddol yw'r gallu i Medr, neu ei asiantau, roi cyngor neu gynhorthwy i ddarparwyr, er mwyn mynd i'r afael ag achosion o ddiffyg cydymffurfio neu'r tebygolrwydd o ddiffyg cydymffurfio. Manylir ar y pwerau hyn a nodir yn Adrannau 37 a 52 o'r Ddeddf isod. Bydd Medr yn nodi'n glir pryd y bwriedir i'r cyngor y mae'n ei gyhoeddi ymgysylltu â'r ddyletswydd statudol i 'roi sylw', a osodir gan yr Amod Cofrestru neu'r Amod Cyllido mewn perthynas â Rhoi Sylw i Gyngor ac Arweiniad, a phryd y mae'n gyfystyr â deunydd cynghori neu arferion da ehangach.
- 3.5.2. **Amodau cofrestru parhaus** – Mae Adran 37 o'r Ddeddf yn galluogi Medr i ddarparu, neu wneud trefniadau ar gyfer darparu, cyngor neu gymorth arall i ddarparwr cofrestredig er mwyn sicrhau cydymffurfedd gan y darparwr â'i amodau cofrestru parhaus. Gall Medr roi'r cyngor neu'r cynhorthwy hwn ei hun neu gomisiynu corff arall i roi'r cyngor neu'r cynhorthwy hwn ar ei ran. Rhaid i gorff llywodraethu'r darparwr roi sylw i'r cyngor neu'r canllawiau a roddir gan Medr (neu ar ran Medr), ac mae hyn yn amod cofrestru parhaus gorfodol. Gall y cyngor fod ar ffurf cyngor a roddir yn benodol i'r darparwr hwnnw neu'n fwy cyffredinol (e.e. i'r holl ddarparwyr cofrestredig neu fathau penodol o ddarparwr).
- 3.5.3. **Ansawdd** – Mae Adran 52 o'r Ddeddf yn galluogi Medr i roi, neu wneud trefniadau ar gyfer rhoi, cyngor neu gynhorthwy arall i unrhyw berson at ddibenion (a) gwella ansawdd yr addysg neu gwrs trydyddol, neu (b) atal ansawdd yr addysg neu gwrs trydyddol rhag dod yn annigonol. O ganlyniad, dylai darparwyr ddisgwyl y gall Medr ymyrryd trwy roi cyngor a chanllawiau mewn achosion lle mae ansawdd addysg mewn perygl o ddod yn annigonol. Mae ansawdd addysg drydyddol, neu gwrs addysg drydyddol, yn cael ei ddiffinio fel bod yn annigonol os nad yw'n ddigonol i ddiwallu anghenion rhesymol y rhai sy'n cael yr addysg neu'n gwneud y cwrs. Mae'r pŵer hwn i roi cyngor a chynhorthwy mewn cysylltiad ag ansawdd yn berthnasol i ddarpariaeth drydyddol:
- (a) a ddarperir gan, neu ar ran, darparwr cofrestredig;
 - (b) a gyllidir gan y Comisiwn neu a sicheir fel arall ganddo; neu
 - (c) a ddarperir yng Nghymru ac nad yw'n dod o dan baragraff (a) na (b) – Darpariaeth nad yw'n cael ei chyflwyno gan ddarparwr cofrestredig na darparwr a gyllidir yw hyn.

O ganlyniad, gellir defnyddio'r pŵer ymyrryd hwn mewn cysylltiad ag ansawdd ar gyfer: darparwyr cofrestredig, a'u partneriaid sy'n cyflwyno darpariaeth ar eu rhan; yr holl ddarparwyr addysg drydyddol a gyllidir gan gynnwys darparwyr addysg uwch, darparwyr addysg bellach, darparwyr prentisiaethau, darparwyr dysgu oedolion, chweched dosbarth mewn ysgolion drwy eu hawdurdodau lleol perthnasol, a'r holl ddarparwyr eraill sy'n darparu addysg drydyddol yng Nghymru.

Rhaid i gorff llywodraethu'r darparwr roi sylw i'r cyngor neu'r canllawiau a roddir gan Medr (neu gan asiant Medr ar ran Medr). Ar gyfer y darparwyr hynny sydd wedi'u cofrestru, mae hwn yn amod cofrestru parhaus gorfodol. Gall y cyngor fod ar ffurf cyngor a roddir yn benodol i'r darparwr hwnnw neu'n fwy cyffredinol (e.e. i'r holl ddarparwyr cofrestredig neu fathau penodol o ddarparwr). Mae rhagor o fanylion am drefniadau Medr ar gyfer darparu cyngor a chymorth mewn perthynas ag ansawdd addysg drydyddol wedi'u nodi yn Fframwaith Ansawdd Medr.

3.6. Adolygiadau o dan Adrannau 38 a 53 o'r Ddeddf

Mae'r adran hon yn berthnasol i: Ddarparwyr cofrestredig ym mhob categori (pob amod cofrestru parhaus), darparwyr allanol (Ansawdd yn unig) darparwyr eraill a gyllidir – gan gynnwys darparwyr addysg bellach a hyfforddiant a chweched dosbarth a gyllidir drwy eu hawdurdodau lleol perthnasol (Ansawdd yn unig) a darpariaeth drydyddol arall yng Nghymru nad yw'n cael ei chyflwyno gan ddarparwr cofrestredig na darparwr a gyllidir (Ansawdd yn unig).

3.6.1. **Amodau cofrestru parhaus** – Mae Adran 38 o'r Ddeddf yn galluogi Medr i gynnal, neu gomisiynu rhywun arall i gynnal, adolygiad o unrhyw faterion y mae'n eu hystyried yn berthnasol i gydymffurfedd gan ddarparwr cofrestredig â'i amodau cofrestru parhaus. Gall adolygiadau fod yn gyffredinol eu natur, neu at ddiben penodol. Gall Medr ddefnyddio canlyniad ymchwiliad i oleuo gweithgareddau cyffredinol y mae'n eu cyflawni. Gall hefyd fod yn rhan o gamau rheoleiddio mae Medr yn penderfynu eu cymryd, gan fod yn angenrheidiol o bosibl i ddarparu'r sylfaen dystiolaeth fanwl sy'n goleuo camau rheoleiddio mwy difrifol.

3.6.2. **Ansawdd** – Mae Adran 53 o'r Ddeddf yn galluogi Medr i gynnal, neu gomisiynu rhywun arall i gynnal, adolygiad o unrhyw faterion y mae'n ystyried eu bod yn berthnasol i ansawdd addysg drydyddol, neu i gwrs penodol o addysg drydyddol:

- (a) a ddarperir gan, neu ar ran, darparwr cofrestredig;
- (b) a gyllidir gan Medr neu a sicrheir fel arall ganddo; neu
- (c) a ddarperir yng Nghymru ac nad yw'n dod o fewn paragraff (a) na (b).

O ganlyniad, gellir defnyddio'r pŵer ymyrryd hwn mewn perthynas ag ansawdd ar gyfer: darparwyr cofrestredig, a'u partneriaid sy'n cyflwyno darpariaeth ar eu rhan; yr holl ddarparwyr addysg drydyddol a gyllidir gan gynnwys darparwyr addysg uwch, darparwyr addysg bellach, darparwyr prentisiaethau, darparwyr dysgu oedolion, chweched dosbarth mewn ysgolion drwy eu hawdurdodau lleol perthnasol, a'r holl ddarparwyr eraill sy'n cyflwyno addysg drydyddol yng Nghymru. Ceir rhagor o fanylion am drefniadau Medr ar gyfer adolygiadau mewn perthynas ag ansawdd addysg drydyddol yn Fframwaith Ansawdd Medr.

3.7. Amodau Cofrestru Parhaus Penodol o dan Adran 29 o'r Ddeddf

Mae'r adran hon yn berthnasol i'r canlynol: Darparwyr cofrestredig yn unig (pob amod cofrestru cychwynnol a pharhaus).

3.7.1. **Amodau parhaus penodol** – Mae Adran 29 o'r Ddeddf yn galluogi Medr i osod Amodau Cofrestru parhaus penodol ar ddarparwr. Fel y dangosir gan [Ffigur 1](#), bydd hyn fel arfer yn cael ei wneud os yw Medr yn adnabod achos o ddiffyg cydymffurfio, neu debygolrwydd o beidio â chydymffurfio, ag Amodau Cofrestru. Bydd y dyfarniad ynglŷn â'r amgylchiadau sy'n cyfiawnhau gosod amodau cofrestru parhaus penodol, a ffurf unrhyw amodau, yn cael ei wneud gan Medr fesul achos. Dylid nodi na fydd Medr fel arfer yn defnyddio amodau cofrestru parhaus penodol i ddelio â mân faterion. Gall Medr ystyried amodau cofrestru parhaus penodol lle mae problemau'n ddigon sylweddol fel na fydd cyngor nac arweiniad yn unig yn ddigonol i fynd i'r afael â'r problemau a nodwyd ond lle byddai ymyrraeth fwy difrifol yn anghymesur. Nid oes angen i Medr fod wedi cyflawni mathau eraill o ymyriad anffurfiol na ffurfiol cyn gosod amodau cofrestru parhaus penodol, er y gall y rhain hefyd fod yn ddwysâd o ymyriad blaenorol. Gall Medr osod yr amodau hyn:

- **Ar adeg y cofrestriad cychwynnol**, lle yr adnabuwyd diffyg cydymffurfio ag amodau cofrestru cychwynnol, neu debygolrwydd o ddiffyg cydymffurfio, ond lle byddai'n anghymesur gwrthod cofrestriad. Byddai hyn yn galluogi Medr i gofrestru darparwr ar y sail y gellir datrys y problemau a nodwyd, er eu bod yn arwyddocaol, o fewn amserlen y cytunwyd arni.
- **Ar ddarparwr sydd eisoes yn gofrestredig**, ar unrhyw adeg lle yr adnabuwyd diffyg cydymffurfio â'r amodau cofrestru parhaus, neu debygolrwydd o ddiffyg cydymffurfio, a lle ceir cyfiawnhad dros gymryd camau ffurfiol i fynd i'r afael â'r materion.

Ar ôl ei osod, gall Medr amrywio neu ddileu amod cofrestru parhaus penodol ar unrhyw adeg.

3.7.2. Mae'r broses ar gyfer gosod amodau cofrestru parhaus penodol wedi'i nodi isod ac yn y siart lif ddilynol.

Cam 1: Hysbysiad cychwynnol a sylwadau'r darparwr

3.7.3. Rhaid i Medr hysbysu corff llywodraethu'r darparwr yn ffurfiol cyn gosod, amrywio neu ddileu amodau cofrestru parhaus penodol. Rhaid i'r hysbysiad i'r corff llywodraethu:

- (a) nodi rhesymau Medr dros fwriadu gosod yr amod/amodau cofrestru parhaus penodol
- (b) nodi'r cyfnod pan all corff llywodraethu'r darparwr addysg drydyddol wneud sylwadau am yr amodau arfaethedig (heb fod yn llai na 28 diwrnod gan ddechrau â'r dyddiad y ceir yr hysbysiad)
- (c) nodi'r ffordd y gellir gwneud y sylwadau hynny.

Rhaid i Medr roi sylw i unrhyw sylwadau a wneir gan gorrff llywodraethu'r darparwr wrth benderfynu a ddylid gosod yr amodau cofrestru penodol parhaus.

Cam 2: Hysbysu, cyhoeddi ac adolygiadau o benderfyniadau

3.7.4. Unwaith y bydd Medr wedi penderfynu gosod amod cofrestru parhaus penodol newydd, neu amrywio neu ddileu amod cofrestru parhaus penodol presennol ai peidio, rhaid iddo hysbysu corff llywodraethu'r darparwr yn ffurfiol o'i benderfyniad, a chyhoeddi'r hysbysiad. Bydd hysbysiadau o'r math hwn yn cael eu cyhoeddi ar wefan Medr fel arfer, gyda'r union leoliad cyhoeddi yn cael ei bennu gan Medr. Rhaid i'r hysbysiad i'r corff llywodraethu:

- nodi'r amod newydd, yr amod fel y'i hamrywiwyd neu'r amod sy'n cael ei ddileu, fel y bo'n briodol
- nodi'r dyddiad pan fydd gosod, amrywio neu ddileu'r amod yn dod i rym.

Lle mae'r hysbysiad i gorff llywodraethu'r darparwr yn ymwneud â gosod neu amrywio amod cofrestru parhaus penodol, rhaid i'r hysbysiad hefyd nodi:

- (a) y seiliau dros osod neu amrywio'r amod
- (b) gwybodaeth am yr hawl i adolygu
- (c) y cyfnod pan ellir gwneud cais am adolygu'r penderfyniad (gweler isod).

3.7.5. Gall corff llywodraethu darparwr wneud cais i'r Adolygydd Penderfyniadau adolygu penderfyniad Medr i osod, neu amrywio, amod cofrestru parhaus penodol ar y darparwr. Person neu banel o bersonau a benodir gan Weinidogion Cymru yw'r Adolygydd Penderfyniadau. Mae'r trefniadau ar gyfer adolygiadau o benderfyniadau wedi'u nodi yn **Rheoliadau'r Comisiwn Addysg Drydyddol ac Ymchwil (Adolygu Penderfyniadau) (Cymru) 2024** ac maent fel a ganlyn:

Y broses ymgeisio a'r cyfnod pan fo'n rhaid gwneud cais

3.7.6. Rhaid i gorff llywodraethu'r darparwr wneud cais am adolygiad o benderfyniad yn ysgrifenedig o fewn 40 o ddiwrnodau i benderfyniad Medr i osod neu amrywio amod cofrestru parhaus penodol ar y darparwr. Rhaid i'r cais nodi'r seiliau y ceisir adolygiad arnynt a chynnwys copi o'r penderfyniad sydd i'w adolygu, gan gynnwys unrhyw resymau dros y penderfyniad a roddwyd gan Medr, ac unrhyw wybodaeth ategol y mae corff llywodraethu'r darparwr yn dymuno i'r Adolygydd Penderfynu ei hystyried.

Y weithdrefn i'w dilyn gan yr Adolygydd Penderfyniadau

3.7.7. Ar ôl cael cais am adolygiad o benderfyniad, rhaid i'r Adolygydd Penderfyniadau anfon copi o'r cais ac unrhyw wybodaeth ategol at Medr, a dweud wrth Medr a chorff llywodraethu'r darparwr (h.y. y ddau barti) pa mor hir y bydd yr adolygiad yn ei gymryd yn ei farn ef.

3.7.8. Caiff yr Adolygydd Penderfyniadau ofyn am wybodaeth ychwanegol gan y partïon a gwahodd y naill a'r llall i gyflwyno sylwadau pellach mewn ymateb i unrhyw wybodaeth ychwanegol a gyflwynir gan y parti arall. Rhaid i Medr a chorff llywodraethu'r darparwr ymateb i unrhyw gais am wybodaeth ychwanegol o fewn 28 diwrnod ar ôl i'r cais ddod i law. Os yw'r Adolygydd Penderfyniadau yn gofyn am wybodaeth neu sylwadau ychwanegol gan y naill barti neu'r llall, rhaid iddo anfon copi o'r canlynol at y parti arall:

1. unrhyw gais y mae wedi'i wneud am wybodaeth neu sylwadau ychwanegol
2. unrhyw wybodaeth neu sylwadau ychwanegol a ddarparwyd

Rhaid i'r Adolygydd Penderfyniadau lunio argymhelliad ysgrifenedig a'i anfon i Medr a chorff llywodraethu'r darparwr.

Argymhellion y gall yr Adolygydd Penderfyniadau eu gwneud

3.7.9. Gall yr Adolygydd Penderfyniadau argymhell bod Medr:

1. yn peidio â chymryd unrhyw gamau gweithredu, lle nad yw'r Adolygydd Penderfyniadau'n canfod bod unrhyw reswm neu fod digon o reswm i Medr ailstyried ei benderfyniad, neu
2. yn ailstyried ei benderfyniad:
 - i. lle mae Medr wedi methu â chydymffurfio â gofyniad gweithdrefnol
 - ii. lle mae'r darparwr wedi darparu gwybodaeth newydd
 - iii. lle mae'r Adolygydd Penderfyniadau'n canfod nad yw Medr wedi ystyried unrhyw ffaith berthnasol
 - iv. lle mae'r Adolygydd Penderfyniadau o'r farn bod y penderfyniad yn anghymesur.

Camau i'w cymryd gan Medr neu Weinidogion Cymru yn dilyn adolygiad

3.7.10. Ar ôl cael argymhelliad gan yr Adolygwr Penderfyniadau, rhaid i Medr:

1. ailstyried ei benderfyniad, os argymhellir ei fod yn gwneud hynny
2. hysbysu corff llywodraethu'r darparwr ynghylch canlyniad ailstyried ei benderfyniad, gan gynnwys ei resymau, o fewn 40 diwrnod i gael yr argymhelliad.

Yn dilyn Adolygiad Penderfyniad, bydd Medr yn ailstyried ei gyhoeddiad o'r amod parhaus penodol yn ôl yr angen.

Cam 3: Amodau'n dod i rym


- 3.7.11. Os nad oes ymgais am adolygiad o benderfyniad, bydd yr amod, neu amrywiad i'r amod, yn dod i rym ar y dyddiad a nodir yn yr hysbysiad i'r corff llywodraethu. Lle mae adolygiad o benderfyniad wedi'i geisio a'i gwblhau, rhaid i Medr ddewis dyddiad yn y dyfodol y bydd yr amod neu'r amrywiad yn dod i rym. Mae'r dyddiad hwnnw'n yn y dyfodol amodol ar yr hyn y mae Medr wedi'i benderfynu ar ôl unrhyw adolygiad o benderfyniad.

Cam 4: Dwysau ymyriad

- 3.7.12. Os na chydymffurfir ag amod cofrestru parhaus penodol, gellir dwysau ymyriad i ddyroddi Cyfarwyddyd mewn perthynas â Diffyg Cydymffurfio ag amodau cofrestru parhaus. Caiff y pŵer hwn i gyhoeddi Cyfarwyddyd ei nodi yn adran 3.8. Pan ystyrir bod y pŵer i gyhoeddi Cyfarwyddyd yn annigonol, gellir dwysau ymyriad i ddileu'r darparwr o gategori ar y gofrestr. Caiff y pŵer dadgofrestru hwn o dan Adran 41(3) o'r Ddeddf ei nodi yn adran 3.10.

Ffigur 2: Siart lif - Amodau Cofrestru Parhaus Penodol o dan Adran 29 o'r Ddeddf

Gellir atal ymyriad ar unrhyw adeg os yw'r darparwr yn cydymffurfio.



*Gall Medr benderfynu gosod amodau parhaus penodol ar gofrestriad lle nad oes cydymffurfedd ag amodau cofrestru cychwynnol ond byddai'n anghymesur gwrthod cofrestriad neu ar ddarparwr cofrestredig lle nad oes cydymffurfedd ag amodau parhaus a bod angen cymryd camau ffurfiol.

3.8. **Cyfarwyddydau ynghylch diffyg cydymffurfio ag amodau cofrestru parhaus (gan gynnwys yr Amod Terfyn Ffioedd) a gyhoeddwyd o dan Adran 39 o'r Ddeddf**

Mae'r adran hon yn berthnasol i'r canlynol: Darparwyr cofrestredig yn unig (pob amod cofrestru parhaus).

- 3.8.1. **Cyfarwyddyd** - Mae Adran 39 o'r Ddeddf yn galluogi Medr i roi cyfarwyddyd i gorff llywodraethu darparwr os yw wedi'i argyhoeddi bod y corff llywodraethu wedi methu, neu'n debygol o fethu, cydymffurfio ag unrhyw amod cofrestru parhaus. Yn achos methiant, neu fethiant tebygol, i gydymffurfio ag amod cofrestru parhaus, gall y cyfarwyddyd a roddir gan Medr gyfarwyddo'r corff llywodraethu i gydymffurfio â'r amod. Yn achos Methiant i Gydymffurfio ag amod Terfyn Ffioedd, gall Medr hefyd, fel dewis arall yn lle cyfarwyddyd, neu yn ychwanegol at gyfarwyddyd i gydymffurfio, gyfarwyddo'r corff llywodraethu i ad-dalu'r holl ffioedd uwchlaw'r terfyn a dalwyd i'r darparwr addysg drydyddol (ystyr ffioedd uwchlaw'r terfyn yw ffioedd cwrs rheoleiddiedig i'r graddau y mae'r ffioedd hynny'n mynd uwchlaw'r terfyn ffioedd cymwys). Gall cyfarwyddyd nodi camau penodol y dylai'r corff llywodraethu eu cymryd (neu beidio) at ddiben cydymffurfio â'r amod cofrestru parhaus. Ar gyfer cyfarwyddyd mewn perthynas ag ad-dalu ffioedd uwchlaw'r terfyn, gall y cyfarwyddyd nodi'r modd y dylai'r ffioedd sydd uwchlaw'r terfyn gael eu had-dalu, neu y gellir eu had-dalu.
- 3.8.2. **Canllawiau** - Gall Medr ddarparu canllawiau cyffredinol ynghylch camau i'w cymryd at ddibenion cydymffurfio â chyfarwyddyd. Cyn darparu canllawiau o'r fath, bydd Medr yn ymgynghori â chorff llywodraethu pob darparwr cofrestredig; a gall ymgynghori â chyrff llywodraethu darparwyr addysg drydyddol eraill yng Nghymru fel y bo'n briodol.
- 3.8.3. Caiff y broses ar gyfer darparu Cyfarwyddyd mewn perthynas â Diffyg Cydymffurfio ag Amodau Cofrestru Parhaus, gan gynnwys yr amod Terfyn Ffioedd, ei nodi isod ac yn y siart lif ddilynol.

Cam 1: Hysbysiad o rybudd a sylwadau'r darparwr

- 3.8.4. Cyn rhoi cyfarwyddyd i gorff llywodraethu, rhaid i Medr roi hysbysiad o rybudd i'r corff llywodraethu yn gyntaf. Bydd yr hysbysiad o rybudd yn:
- nodi'r cyfarwyddyd arfaethedig
 - nodi'r rhesymau dros fwriadu ei roi
 - nodi'r cyfnod pan all y corff llywodraethu wneud sylwadau am yr hysbysiad neu'r cyfarwyddyd arfaethedig (heb fod yn llai na 28 diwrnod gan ddechrau â'r dyddiad y mae'r hysbysiad o rybudd yn dod i law)
 - nodi'r ffordd y gellir gwneud y sylwadau hynny.

Rhaid i Medr roi sylw i unrhyw sylwadau a wneir gan gorff llywodraethu'r darparwr wrth benderfynu a ddylid rhoi'r cyfarwyddyd.

Cam 2: Rhoi cyfarwyddyd, cyhoeddi ac adolygiadau o benderfyniadau

3.8.5. Ar ôl penderfynu a ddylid rhoi'r cyfarwyddyd, rhaid i Medr hysbysu corff llywodraethu'r darparwr o'i benderfyniad. Os yw Medr yn rhoi cyfarwyddyd i'r corff llywodraethu, rhaid i'r cyfarwyddyd nodi'r dyddiad y daw i rym. Ar yr un pryd ag y mae'n rhoi'r cyfarwyddyd, rhaid i Medr hefyd roi datganiad i gorff llywodraethu'r darparwr sy'n nodi:

- y rhesymau dros roi'r cyfarwyddyd
- gwybodaeth am yr hawl i adolygu
- y cyfnod pan ellir gwneud cais am adolygu'r penderfyniad

3.8.6. Os yw Medr yn rhoi cyfarwyddyd i ddarparwr, rhaid iddo:

- roi copi o'r cyfarwyddyd i Weinidogion Cymru
- cyhoeddi'r cyfarwyddyd

Fel arfer, bydd cyfarwyddiadau o'r math hwn yn cael eu cyhoeddi ar wefan Medr, a bydd Medr yn pennu union leoliad y cyhoeddiad.

Gall corff llywodraethu darparwr wneud cais am adolygiad gan yr Adolygydd Penderfyniadau o benderfyniad Medr i roi cyfarwyddyd. Person neu banel o bersonau a benodir gan Weinidogion Cymru yw'r Adolygydd Penderfyniadau. Mae'r trefniadau ar gyfer adolygiadau o benderfyniadau wedi'u nodi yn Rheoliadau'r Comisiwn Addysg Drydyddol ac Ymchwil (Adolygu Penderfyniadau) (Cymru) 2024 ac maent wedi'u cynnwys o dan baragraff 3.7.5. Yn dilyn Adolygiad Penderfyniad, bydd Medr yn ailystyried ei gyhoeddiad blaenorol yn ôl yr angen.

Cam 3: Cyfarwyddyd yn dod i rym

3.8.7. Os na cheisir adolygiad o benderfyniad, bydd y cyfarwyddyd yn dod i rym ar y dyddiad a nodir yn yr hysbysiad a gyhoeddir i'r corff llywodraethu. Lle mae adolygiad o benderfyniad wedi'i geisio a'i gwblhau, rhaid i Medr ddewis dyddiad yn y dyfodol y bydd y cyfarwyddyd yn dod i rym. Mae'r dyddiad hwnnw yn y dyfodol yn amodol ar yr hyn y mae Medr wedi'i benderfynu ar ôl unrhyw adolygiad o benderfyniad.

Cam 4: Gorfodi


3.8.8. Pan fo Medr yn rhoi Cyfarwyddyd mewn perthynas â Methiant i Gydymffurfio ag amodau cofrestru parhaus i gorff llywodraethu sefydliad, rhaid i'r corff llywodraethu gydymffurfio â'r Cyfarwyddyd (yn amodol ar ganlyniad unrhyw adolygiad o'r Cyfarwyddyd). Os bydd corff llywodraethu'n methu â chydymffurfio'n foddhaol â'r Cyfarwyddyd (ym marn Medr), bydd y Cyfarwyddyd yn orfodadwy trwy waharddeb yn unol ag Adran 82 o'r Ddeddf. Bydd ein penderfyniadau ynghylch bwrw ymlaen â gwaharddeb neu beidio yn ystyried amgylchiadau penodol yr achos.

Cam 5: Dwysau ymyriad

3.8.9. Os ceir achosion mynych o ddiffyg cydymffurfio, gall ymyriad gael ei ddwysau i ddileu'r darparwr o gategori ar y gofrestr. Caiff y pŵer dadgofrestru hwn o dan Adran 41(3) o'r Ddeddf ei nodi yn adran 3.10.

Ffigur 3: Siart Lif - Cyfarwyddyd mewn perthynas â Methiant i Gydymffurfio ag Amodau Cofrestru Parhaus (gan gynnwys amod Terfyn Ffioedd) o dan Adran 39 o'r Ddeddf

Gellir atal ymyriad ar unrhyw adeg os yw'r darparwr yn cydymffurfio.



3.9. Cyfarwyddyd mewn perthynas â methiant i gydweithredu a gyhoeddwyd o dan Adran 73(4) o'r Ddeddf

Mae'r adran hon yn berthnasol i'r canlynol: Darparwyr allanol a darparwyr addysg bellach a hyfforddiant a gyllidir (heb gynnwys darparwyr cofrestredig).

- 3.9.1. **Dyletswydd i gydweithredu – darparwyr allanol –** Rhaid i gorff llywodraethu darparwr allanol (darparwr sy'n cyflwyno darpariaeth ar ran darparwr cofrestredig) sicrhau bod person sy'n arfer swyddogaeth yn rhinwedd Adran 51, 53 neu 54(1) o'r Ddeddf yn cael pa bynnag wybodaeth, cynhorthwy a mynediad at gyfleusterau, systemau ac offer y darparwr allanol y mae'r person yn rhesymol yn ei gwneud yn ofynnol eu darparu at ddibenion arfer y swyddogaeth (gan gynnwys at ddiben arfer unrhyw bŵer o dan Adran 74 o'r Ddeddf). Y swyddogaethau a gwmpesir gan y ddyletswydd hon i gydweithredu yw:
- Adran 51 – dyletswydd i fonitro ansawdd addysg drydyddol reoleiddiedig a hybu gwelliant yn ansawdd yr addysg honno;
 - Adran 53 – adolygiadau sy'n berthnasol i ansawdd addysg drydyddol
 - Adran 54(1) – asesu ansawdd addysg uwch
 - Adran 74 – mynd i fangre darparwr cofrestredig ac edrych ar ddogfennau, eu copïo a'u cymryd.
- 3.9.2. **Dyletswydd i gydweithredu – darparwyr addysg bellach a hyfforddiant (heb gynnwys darparwyr cofrestredig) –** Rhaid i gorff llywodraethu darparwr addysg bellach neu hyfforddiant a gyllidir o dan Adran 97 o'r Ddeddf sicrhau bod person sy'n arfer swyddogaeth yn rhinwedd Adran 51 neu 53 yn cael pa bynnag wybodaeth, cynhorthwy a mynediad at gyfleusterau, systemau ac offer y darparwr y mae'r person yn rhesymol yn ei gwneud yn ofynnol eu darparu at ddibenion arfer y swyddogaeth (gan gynnwys at ddiben arfer unrhyw bŵer o dan Adran 74 o'r Ddeddf).
- 3.9.3. **Cyfarwyddyd –** Os yw Medr wedi ei argyhoeddi bod corff llywodraethu wedi methu â chydymffurfio â'r ddyletswydd berthnasol i gydweithredu yn y paragraffau uchod, mae Adran 73(4) o'r Ddeddf yn galluogi Medr i gyfarwyddo'r corff llywodraethu i gymryd (neu beidio â chymryd) camau penodol at ddiben sicrhau darparu gwybodaeth, cynhorthwy neu fynediad fel a ddisgrifir ym mharagraffau 3.9.1 a 3.9.2 uchod (fel y bo'n briodol).
- 3.9.4. **Canllawiau –** Gall Medr ddarparu canllawiau cyffredinol ynghylch camau i'w cymryd at ddiben cydymffurfio â chyfarwyddyd. Cyn darparu canllawiau o'r fath, bydd Medr yn ymgynghori â chorff llywodraethu pob darparwr cofrestredig; a gall ymgynghori â chyrff llywodraethu darparwyr addysg drydyddol eraill yng Nghymru fel y bo'n briodol.
- 3.9.5. Caiff y broses ar gyfer rhoi Cyfarwyddyd mewn perthynas â Methiant i Gydweithredu ei nodi isod ac yn y siart lif ddilynol.

Cam 1: Hysbysiad o rybudd a sylwadau'r darparwr

3.9.6. Cyn rhoi cyfarwyddyd i gorff llywodraethu, rhaid i Medr roi hysbysiad o rybudd i'r corff llywodraethu yn gyntaf. Bydd yr hysbysiad o rybudd yn:

- nodi'r cyfarwyddyd arfaethedig,
- nodi'r rhesymau dros fwriadu ei roi,
- nodi'r cyfnod pan all y corff llywodraethu wneud sylwadau am yr hysbysiad neu'r cyfarwyddyd arfaethedig (heb fod yn llai na 28 diwrnod gan ddechrau â'r dyddiad y mae'r hysbysiad rhybuddio'n dod i law),
- nodi'r ffordd y gellir gwneud y sylwadau hynny.

Rhaid i Medr roi sylw i unrhyw sylwadau a wneir gan gorff llywodraethu'r darparwr wrth benderfynu a ddylid rhoi'r cyfarwyddyd.

Cam 2: Rhoi cyfarwyddyd, cyhoeddi ac adolygiadau o benderfyniadau

3.9.7. Ar ôl penderfynu a ddylid rhoi'r cyfarwyddyd, rhaid i Medr hysbysu corff llywodraethu'r darparwr o'i benderfyniad. Os yw Medr yn rhoi cyfarwyddyd i'r corff llywodraethu, rhaid i'r cyfarwyddyd nodi'r dyddiad y daw i rym. Ar yr un pryd ag y mae'n rhoi'r cyfarwyddyd, rhaid i Medr hefyd roi datganiad i gorff llywodraethu'r darparwr sy'n nodi:

- y rhesymau dros roi'r cyfarwyddyd,
- gwybodaeth am yr hawl i adolygu,
- y cyfnod pan ellir gwneud cais am adolygu'r penderfyniad.

3.9.8. Os yw Medr yn rhoi cyfarwyddyd i ddarparwr, rhaid iddo:

- roi copi o'r cyfarwyddyd i Weinidogion Cymru;
- cyhoeddi'r cyfarwyddyd.

Fel arfer, bydd cyfarwyddiadau o'r math hwn yn cael eu cyhoeddi ar wefan Medr, a bydd Medr yn pennu union leoliad y cyhoeddiad.


Gall corff llywodraethu darparwr wneud cais am adolygiad gan yr Adolygydd Penderfyniadau o benderfyniad Medr i roi cyfarwyddyd. Person neu banel o bersonau a benodir gan Weinidogion Cymru yw'r Adolygydd Penderfyniadau. Mae'r trefniadau ar gyfer adolygiadau o benderfyniadau wedi'u nodi yn Rheoliadau'r Comisiwn Addysg Drydyddol ac Ymchwil (Adolygu Penderfyniadau) (Cymru) 2024 ac maent wedi'u cynnwys o dan baragraff 3.7.5. Yn dilyn Adolygiad Penderfyniad, bydd Medr yn ailystyried ei gyhoeddiad blaenorol yn ôl yr angen.

Cam 3: Cyfarwyddyd yn dod i rym

3.9.9. Os na cheisir adolygiad o benderfyniad, bydd y cyfarwyddyd yn dod i rym ar y dyddiad a nodir yn yr hysbysiad a gyhoeddir i'r corff llywodraethu. Lle mae adolygiad o benderfyniad wedi'i geisio a'i gwblhau, rhaid i Medr ddewis dyddiad yn y dyfodol y bydd y cyfarwyddyd yn dod i rym. Mae'r dyddiad hwnnw yn y dyfodol yn amodol ar yr hyn y mae Medr wedi'i benderfynu ar ôl unrhyw adolygiad o benderfyniad.

Ffigur 4: Siart lif – Cyfarwyddyd mewn perthynas â Methiant i Gydweithredu a Gyhoeddwyd o dan Adran 73(4) o'r Ddeddf

Gellir atal ymyriad ar unrhyw adeg os yw'r darparwr yn cydymffurfio.



3.10. Dadgofrestru o dan Adran 41(3) o'r Ddeddf

Mae'r adran hon yn berthnasol i'r canlynol: Darparwyr cofrestredig a, thrwy estyniad, darparwyr allanol sy'n cyflwyno darpariaeth ar ran y darparwyr cofrestredig hynny.

- 3.10.1. **Amgylchiadau lle gall Medr ddadgofrestru darparwr** - Mae Adran 41(3) o'r Ddeddf yn galluogi Medr i ddileu darparwr addysg drydyddol o gategori ar y gofrestr os ceir diffyg cydymffurfio mynych neu ddifrifol iawn ag amodau cofrestru parhaus. Er mwyn i hynny ddigwydd, rhaid bodloni naill ai amod A neu amod B (gweler isod):

Mae Amod A, sy'n ymwneud â diffyg cydymffurfio mynych, wedi ei fodloni:

- (a) os yw Medr wedi arfer ei bwerau cyfarwyddo yn flaenorol o dan Adran 39 y Ddeddf (Cyfarwyddyd mewn perthynas â Methiant i Gydymffurfio ag amodau cofrestru parhaus) mewn perthynas â diffyg cydymffurfio ag un o'r amodau cofrestru parhaus sy'n gymwys i gategori cofrestru'r darparwr

a

- (b) os yw Medr o'r farn:

- (i) bod yr amod cofrestru hwnnw wedi cael ei dorri unwaith eto, neu'n cael ei dorri'n fynych, neu
- (ii) bod achos o dorri amod cofrestru parhaus gwahanol, neu y bu achos felly, sy'n berthnasol i gategori cofrestru'r darparwr.

Mae Amod B, sy'n ymwneud â diffyg cydymffurfio difrifol iawn, wedi'i fodloni os yw Medr o'r farn:

- (a) bod un o'r amodau cofrestru parhaus sy'n gymwys i gategori cofrestru'r darparwr yn cael ei dorri neu wedi cael ei dorri, **a**
- (b) bod ei bwerau o dan Adran 39 o'r Ddeddf (Cyfarwyddyd mewn perthynas â Methiant i Gydymffurfio ag amodau cofrestru parhaus) yn annigonol i ymdrin â'r tor amod (pa un a ydynt wedi cael eu harfer, yn cael eu harfer neu'n mynd i gael eu harfer mewn perthynas ag ef ai peidio).

Cam 1: Hysbysiad cychwynnol a sylwadau'r darparwr

- 3.10.2. Cyn dileu darparwr cofrestredig o gategori ar y gofrestr o dan Adran 41 o'r Ddeddf, rhaid i Medr hysbysu'r corff llywodraethu yn gyntaf. Bydd yr hysbysiad yn:

- nodi rhesymau Medr dros fwriadu dileu'r darparwr o gategori ar y gofrestr
- nodi'r cyfnod pan all corff llywodraethu'r darparwr wneud sylwadau am y cynnig (heb fod yn llai na 28 diwrnod gan ddechrau â'r dyddiad y mae'r hysbysiad o rybudd yn dod i law)
- rhaid i Medr roi sylw i unrhyw sylwadau a wneir gan gorff llywodraethu'r darparwr yn unol â'r hysbysiad wrth benderfynu a ddylid ei ddileu o gategori ar y gofrestr

Bydd Medr yn rhannu copi o'r hysbysiad gyda Gweinidogion Cymru a bydd yn rhoi gwybodaeth gyson i swyddogion Llywodraeth Cymru am y broses ddileu.

Cam 2: Hysbysu ac adolygiadau o benderfyniadau

- 3.10.3. Ar ôl penderfynu p'un a ddylid dileu'r darparwr o gategori ar y gofrestr ai peidio, rhaid i Medr hysbysu corff llywodraethu'r darparwr o'i benderfyniad. Pan fo'r penderfyniad yn un i ddileu'r darparwr o gategori ar y gofrestr, rhaid i'r hysbysiad nodi'r dyddiad pan fydd y dilead yn dod i rym. Rhaid i'r hysbysiad hefyd nodi:
- y rhesymau dros y dilead
 - gwybodaeth am yr hawl i adolygiad
 - y cyfnod pan ellir gwneud cais am adolygiad
- 3.10.4. Gall corff llywodraethu darparwr wneud cais am adolygiad gan yr Adolygydd Penderfyniadau o benderfyniad Medr i'w ddileu o gategori ar y gofrestr. Person neu banel o bersonau a benodir gan Weinidogion Cymru yw'r Adolygydd Penderfyniadau. Mae'r trefniadau ar gyfer adolygiadau o benderfyniadau wedi'u nodi yn Rheoliadau'r Comisiwn Addysg Drydyddol ac Ymchwil (Adolygu Penderfyniadau) (Cymru) 2024 ac maent wedi'u cynnwys ym mharagraff 3.7.5.


Cam 3: Dilead yn dod i rym

- 3.10.5. Os na cheisir adolygiad o benderfyniad, bydd y darparwr yn cael ei dynnu o gategori'r cofrestr o dan Adran 41 o'r Ddeddf ar y dyddiad a bennir yn yr hysbysiad a anfonwyd i gorff llywodraethu'r darparwr. Lle mae adolygiad o benderfyniad wedi'i geisio a'i gwblhau, rhaid i Medr benderfynu ar ddyddiad yn y dyfodol y caiff hyn ddod i rym. Mae'r dyddiad hwnnw yn y dyfodol yn amodol ar yr hyn y mae Medr wedi'i benderfynu ar ôl unrhyw adolygiad o benderfyniad. Unwaith y mae'r darparwr wedi cael ei ddileu o'r categori ar y gofrestr, bydd y gofrestr a gyhoeddwyd yn cael ei diweddarau i adlewyrchu'r dilead hwnnw.
- 3.10.6. *Cofrestru mewn categori arall ar ôl dilead* - Pan fydd Medr yn dileu darparwr cofrestredig o gategori ar y gofrestr o dan bwerau Adran 41(3) o'r Ddeddf, gall Medr gofrestru'r darparwr mewn categori arall heb gais:
- os yw corff llywodraethu'r darparwr yn cydsynio
 - os yw'n parhau i fod yn ddarparwr addysg drydyddol yng Nghymru
 - os yw'n darparu'r math o addysg drydyddol sy'n ymwneud â'r categori arall neu os darperir y math hwnnw o addysg drydyddol ar ei ran
 - os yw'n bodloni'r amodau cofrestru cychwynnol sy'n gymwys iddo mewn perthynas â'r cofrestriad yn y categori arall (gweler Adran 27), ac nid yw cofrestru yn y categori arall wedi'i wahardd gan ddarpariaeth a wneir mewn rheoliadau
- 3.10.7. *Lleihau i'r eithaf effaith ar ddysgwyr* - Er mwyn diogelu dysgwyr, gall Gweinidogion Cymru, drwy reoliadau, wneud darpariaeth drosiannol neu arbed mewn cysylltiad â dileu darparwr o gategori ar y gofrestr. Bwriad hyn yw sicrhau y caiff arian cyhoeddus a buddiannau myfyrwyr eu diogelu a gall gynnwys sicrhau bod Medr yn cadw rhai pwerau rheoleiddio penodol mewn perthynas â darparwr sydd wedi'i

ddadgofrestru, neu fod rhai ffrydiau cyllid penodol yn parhau i fod ar gael dros dro i fyfyrwyr er mwyn sicrhau bod y cwrs yn parhau ac yn cael ei gwblhau.

Ffigur 5: Siart Lif - Datgofrestru o dan Adran 41(3) o'r Ddeddf

Gellir atal ymyriad ar unrhyw adeg os yw'r darparwr yn cydymffurfio.



3.11. Dadgofrestru Gorfodol o dan Adran 41(1) o'r Ddeddf

Mae'r adran hon yn berthnasol i'r canlynol: Darparwyr cofrestredig a, thrwy estyniad, darparwyr allanol sy'n cyflwyno darpariaeth ar ran y darparwyr cofrestredig hynny.

3.11.1. Ceir amgylchiadau lle mae dyletswydd gyfreithiol ar Medr i ddileu darparwr o gategori ar y gofrestr. Mae Adran 41(1) o'r Ddeddf yn ei gwneud yn ofynnol i Medr ddileu darparwr addysg drydyddol o gategori ar y gofrestr os nad yw'r darparwr:

- yn ddarparwr addysg drydyddol yng Nghymru mwyach, neu
- yn darparu'r math o addysg drydyddol sy'n ymwneud â'r categori mwyach, neu na ddarperir y math hwnnw o addysg drydyddol ar ei ran mwyach

Gall Gweinidogion Cymru, trwy reoliadau, nodi amgylchiadau eraill lle mae'n rhaid dileu darparwr cofrestredig o un neu fwy o'r categorïau ar y gofrestr neu bob categori ar y gofrestr. Bydd y ddogfen hon yn cael ei diweddarau os gwneir rheoliadau o'r fath.

Cam 1: Hysbysiad o rybudd a sylwadau'r darparwr

3.11.2. Cyn dileu darparwr cofrestredig o gategori ar y gofrestr o dan Adran 41 o'r Ddeddf, rhaid i Medr roi hysbysiad o rybudd i'r corff llywodraethu yn gyntaf. Bydd yr hysbysiad o rybudd yn:

- nodi rhesymau Medr dros fwriadu dileu'r darparwr o gategori ar y gofrestr
- nodi'r cyfnod pan all corff llywodraethu'r darparwr wneud sylwadau am y cynnig (heb fod yn llai na 28 diwrnod gan ddechrau â'r dyddiad y mae'r hysbysiad o rybudd yn dod i law)
- rhaid i Medr roi sylw i unrhyw sylwadau a wneir gan gorff llywodraethu'r darparwr yn unol â'r hysbysiad wrth benderfynu a ddylid ei ddileu o gategori ar y gofrestr

Bydd Medr yn rhannu copi o'r hysbysiad rhybuddio gyda Gweinidogion Cymru a bydd yn rhoi gwybodaeth gyson i swyddogion Llywodraeth Cymru am y broses ddileu.

Cam 2: Hysbysu ac adolygiadau o benderfyniadau

3.11.3. Ar ôl penderfynu p'un a ddylid dileu'r darparwr o gategori ar y gofrestr ai peidio, rhaid i Medr hysbysu corff llywodraethu'r darparwr o'i benderfyniad. Pan fo'r penderfyniad yn un i ddileu'r darparwr o gategori ar y gofrestr, rhaid i'r hysbysiad nodi'r dyddiad pan fydd y dilead yn dod i rym. Rhaid i'r hysbysiad hefyd nodi:

- y sail dros ddileu
- gwybodaeth am yr hawl i adolygiad
- y cyfnod pan ellir gwneud cais am adolygu'r penderfyniad


3.11.4. Gall corff llywodraethu darparwr wneud cais am adolygiad gan yr Adolygydd Penderfyniadau o benderfyniad Medr i'w ddileu o gategori ar y gofrestr. Person

neu banel o bersonau a benodir gan Weinidogion Cymru yw'r Adolygydd Penderfyniadau. Mae'r trefniadau ar gyfer adolygiadau o benderfyniadau wedi'u nodi yn Rheoliadau'r Comisiwn Addysg Drydyddol ac Ymchwil (Adolygu Penderfyniadau) (Cymru) 2024 ac maent wedi'u cynnwys ym mharagraff 3.7.5.

Cam 3: Dilead yn dod i rym

- 3.11.5. Os na cheisir adolygiad o benderfyniad, bydd y darparwr yn cael ei dynnu o gatedori'r cofrestr o dan Adran 41(1) o'r Ddeddf ar y dyddiad a bennir yn yr hysbysiad a anfonwyd i gorff llywodraethu'r darparwr. Lle mae adolygiad o benderfyniad wedi'i geisio a'i gwblhau, rhaid i Medr benderfynu ar ddyddiad yn y dyfodol y caiff hyn ddod i rym. Mae'r dyddiad hwnnw yn y dyfodol yn amodol ar yr hyn y mae Medr wedi'i benderfynu ar ôl unrhyw adolygiad o benderfyniad. Unwaith y mae'r darparwr wedi cael ei ddileu o'r gatedori ar y gofrestr, bydd y gofrestr a gyhoeddwyd yn cael ei diweddarau i adlewyrchu'r dilead hwnnw.
- 3.11.6. *Lleihau i'r eithaf effaith ar ddysgwyr* – Er mwyn diogelu dysgwyr, gall Gweinidogion Cymru, trwy reoliadau, wneud darpariaeth drosiannol neu arbed mewn perthynas â dileu darparwr o gatedori ar y gofrestr. Bwriad hyn yw sicrhau bod arian cyhoeddus a buddiannau myfyrwyr yn cael eu diogelu a gall gynnwys sicrhau bod Medr yn cadw rhai pwerau rheoleiddio penodol mewn perthynas â darparwr sydd wedi'i ddadgofrestru, neu fod rhai ffrydiau cyllid penodol yn parhau i fod ar gael dros dro i fyfyrwyr er mwyn sicrhau bod y cwrs yn parhau ac yn cael ei gwblhau.

Ffigur 6: Siart Lif – Dadgofrestru gorfodol o dan Adran 41(1) o'r Ddeddf



Medr

Y Comisiwn Addysg Drydyddol ac Ymchwil
Commission for Tertiary Education and Research

www.medr.cymru

2 Cwr y Ddinas
Stryd Tyndall
Caerdydd
CF10 4BZ

2 Capital Quarter
Tyndall Street
Cardiff
CF10 4BZ



Noddir gan
Lywodraeth Cymru
Sponsored by
Welsh Government